

**Date – 23/12/2024**

**Time - 18:30 -18:40Hrs**

**REGIONAL NEWS BULLETIN**

**HEADLINES (EVENING)**

1. Home Minister Pu K. Sapdanga chuan tunhnaia Airfield khua a thihna chungchanga mawhphurtu a rinhleh mi pahnih man an nih thu a sawi.
2. Chakma autonomous district council (CADC)-ah BJP in MDC 13 neiin sorkarna an siam theih thu an hriattir.
3. Prime Minister Narendra Modi-a'n kum 1 leh a chanve kalta chung khan ram chung thalai nuai 10 chuang hnenah sawrkar hna pek a ni a ti.
4. Vawiin khan ram pumah Lo Neitute Ni hman a ni.

<><><>

**HOME MINISTER**

Home Minister Pu K. Sapdanga chuan tunhnaia Airfield khua a rukruk kaihnawihana nunna chan chungchangah mawhphurtu ni a rinhleh mi pahnih man an nih thu leh lunginah dah luh an nih thu a sawi.

Airfield khuaa thil thleng chungchanga vawiina chanchinbumite a kawmnaah Home Minister chuan he thu hi sawiin midang inhnawih an awm leh awm loh dan anga chhui mek zel a nih thu a sawi a. Thihna tuartu chungkuate chu Mizoram sorkarin a lainat thu leh dan anga hma lak zel a nih dawn thu a sawi a ni.

Home Minister chuan Mizorama dan bawhchhiatna veng turin khawtlanga tana thawktuten thahnemngai takin mahni khua leh vengah hma an lak thin thu leh hetiang thawkte hi sorkar chuan chhuanawm a tih thu a sawi a. Chutihrualin khawtlang hmalakna hrang hrang dan huangchhunga chet thin a pawimawh tih hriat a ngai a ni a ti a. Khawtlang leh ram tana thil tha lo do kawngah fimkhur taka dan huangchhunga chet zel ni se, dan bawhchhetu ni a rinhleh te pawh a rang thei anga police leh sorkara mawhphurtute kuta hlan thuai thin ni se an duh thu a sawi a. Mitinin mihring an nih anga dikna chanvo an neih hlu tak inzahsak thiam zel a pawimawh thu a sawi bawka ni.

<><><>

## CESJ ON LYNCHING

Centre for Environment and Social Justice (CESJ) chuan vawiin khan thu chhuahin Airfield veng a cheng David Lalmuanpuia thihna chungchang a inhnamhnawih zawng zawngte man vek an phut.

CESJ chuan he pawikhawihna a inhnamhnawihte hi dan anga hremna an hmuh ngei theihna tur leh dikna hlen chhuah a nih theih nan thlei bik leh hlauh nei lova hma la turin thuneitute an beisei tlat thu an sawi a. He thil thlenga inhnamhnawih zawng zawng man an nih vek theihna turin thuneitute'n rang takin hma la rawh se, an ti a. He thil rapthlak tak thlengah hian sawrkar hmalakna an ngaichang reng tih sawiin, a chak tawh loh emaw, a zuzi zawnga a kal chuan emaw loh theih loha National Human Rights Commission (NHRC) ah mipui beisei angin an thlen a ngaih dawn thu an sawi bawh a ni.

Mizoram ah khawtlang duty ten mi tam tak an vaw hlum tawh a, heng hi a thlen tawh loh na'n home department hian, khawtlanga tlawmngai pawl ten Police an thawhpui theihna tûrin The Assam Village Defence Organisation Act 1966 hnuai ami chhawm chhoh Village Defence Party (VDP), The Mizoram Police Act hnuai zeh luh hi, ennawn niin siam that thuai ni rawh se, an ti a. Training nei reng reng lo, mihring nun hlutna pawh hre lo, khawtlanga duty (VDP/YMA/JAC Duty/te) hi a hlauhawm lutuk a, dan hnuai hna an thawh dan zawn thuai a nih loh chuan nunna hlu tak channa a thleng zel dawn a ni, an ti.



## HOME MINISTER ON FIREWORKS

Home Minister Pu K. Sapdanga chuan hunpui Krismas leh Kumthar lo thleng tura mipuiin halpuah an hal loh na'n kumdang aia zirtirna lamah sum an seng hnem tih a sawi.

Home Minister chuan kuminah hian halpuah hal lo tura inzirtir kawngah kumin anga Kohhran, YMA leh chanchinbumite an tanrual a la awm loa a hriat thu leh kuminah chuan an khap hlawhtlin ngei an inbeisei thu Akashvani a hrilh a. Kohhran thenkhatah chuan pulpit hialah te pawh sawi an awm thu sawiin YMA te pawhin nasa takin zirtir hna an thawk a ni a ti a. Chanchinbumite pawhin puanzar mai ni loin rawtna tha tak tak te sorkarah thlenin an tang hle a ni a ti a. Kuminah mipuiten halpuah an hal loh ngei an beisei thu a sawi a ni.

Home Minister chuan nak zan, Krismas urlawhkan zana hian a hoin police hotu hrang hrangte leh an thawhpui dangten khawlai an fan kual dawn thu a sawi a. Tun thla ni 31 zana phei chuan an uar zual dawn thu a sawi a. Police te officer te hona hnuai khawpui chung an fan kual reng dawn thu a sawi a. Halpuah puah tir dan ngaihtuahtute thawhrimna aia nasa-in a puah loh dan ngaihtuahtu pawl te thawhrimna a nasat zawk thu a sawi a ni.



## NO VEHICLE ZONE

Vawiin atang khan kumin Krismas leh Kum thar vuakveta Aizawl khawpui chhunga mipui bazar; kea kalte him zawk nan lirthei tlanlohna hmun No Vehicle Zone chu kalpui tan a ni a, mipuiten an hlut hle a, mipui tam tak kein Aizawl bazarah an kal.

Coordination Committee on Traffic Management in a ruahman angin Krismas hma bikah chuan vawiin leh naktuk, urlawk niah te No Vehicle Zone hi Chanmari leh Zodin Square inkarah zing dar 10:00 atanga tlai dar 4:00 chhungin kalpui tur a ni a. Kumthar dawnah ni 31-ah kalpui a ni dawn bawk a ni. Vawiina No Vehicle Zone kalpuiah hian mipui tam tak kein an bazar nghal a. Nidanga lirthei dahna leh lirthei tlanna hmunah mi tam takin thil zuarin a inphochhuak a, naupang te infiamna leh ennawm hrang hrang phochhuah a ni bawk a ni. Vawiina No Vehicle Zone-a bazar Pu Lalremruata chuan No Vehicle Zone kalpui chu mi thenkhat tan harsatna siamtu ni thei mahse zalen taka mipuite bazarna atana hmalakna tha tak ni a a hriat thu Akashvani a hirih.

No Vehicle Zone kalpui mekah hian lirthei tlan tawpna pahnih Chanmari leh Zodin Square-ah te traffic police thahnem takin an vil a. Lirthei te chu an passenger te an dah tir hnuah tlantir leh zel an ni a. Heng a tanna pahnih atang hian mipuite kein an kal tan a ni.

No Vehicle Zone hian Emergency duty bakah, natna avanga Damdawiin pante a huam lo a. Coordination Committee on Traffic Management te chuan lirtheia chuang te chhuk na tur bakah lirthei chi hrang hrang hunna tur ruahmanna an siam bawk a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## TC LALMUANKIMA

Akashvani Aizawl Regional News Unit a nihna pawimawh tak chelhtu TC Lalmuankima chu a chetsualna a a lu a tauh avangin vawiin khan Aizawl Hospital-ah a thi.

TC Lalmuankima hian kum 2004 September thla atangin Akashvani Aizawl (All India Radio)-ah typist hna chelhin a zawm a. Hemi hnu hian Correspondent, NRT leh Editor hna te a chelh zui a. Tunah hian New India Samachar buatsaihtu a ni mek a ni. TC Lalmuankima hi nimin khan Luangmual Vengah vuiliam a ni.

><><>

## CADC

Chakma autonomous district council (CADC)-ah BJP in MDC 13 neiin sorkarna an siam theih thu an legislature party hruaitu Pu Molin Kumar Chakma chuan vawiin khan District Council & Minority Affairs Secretary hnenah a hriattir.

CADC district BJP president Pu Durjya Dhan Chakma hnen atanga Akashvani Aizawl-in thu a dawn danin vawiin khan Mizoram BJP unit president Pu Vanlalhmuaka kaihhruai-in CADC BJP legislature party an thukhawm a. Vawiin khan MDC pakhat Pu Ajoy Kumar Chakma chuan ZPM chhuahsanin BJP a zawm nghal a. Heti hian BJP hian member 20 awmna CADC-ah hian BJP chan MDC 13 a nei ta tih Pu DD Chakma chuan a sawi a. BJP legislature party vawiina Aizawla thukhawm hian an hruaitu atan Pu Molin Kumar Chakma chu thlangin deputy leader-ah Pu Doymoy Daveng Chakma, secretary-ah Pu Kalasoga Chakma leh treasurer atan Pu Ajoy Kumar Chakma te thlan an ni bawk a. DC&MA secretary hnenah sorkar an siam theih thu an thlen tawh avangin tul bik a nih loh chuan larsap hmuh kher a ngai lo niin CADC BJP district president chuan a sawi a ni.

Sorkarin ruahmanna a siam fel hunah leh BJP legislature party hruaitu Pu Molin Kumar Chakma dilna hi pawm a nih hunah sorkarna siamna hun pek an ni ang a. Pu Molin Kumar Chakma hi chief executive member (CEM) atana ruatin a ni hian a thawhpui tur executive member (EM) dangte leh nihna chelhtu dangte a ruat leh ang a. Council inkhawma thlawptu a ngah tawk leh tawk loh finfiahna hun pawh ruat a ni dawn tura ngaih a ni.

Tun thla ni 11-a CEM ni lai Pu Rasik Mohan Chakma kaihhruai MNF sorkar paihthlak a nih hnu-ah sorkarna siam thei mai an awm lova. ZPM chuan MDC 10 nei-in sorkarna an siam theih thu December ni 16 khan larsap hnenah an thlen a. Hemi hnu hian BJP hian sorkar an siam theih thu an thlen leh ta a ni.

<><><>

## **ROZGAR MELA**

Vawiina Prime Minister Narendra Modi hoa thalai te hna hmuhna, appointment letter pekchhuahna hun Rozgar Mela hmanah thalai 70,000 chuang hnenah hna hmuhna appointment letter pekchhuah a ni.

Prime Minister chuan thu sawiin ramchhungah kum 1 leh a chanve chhungin thalaiten sorkar hna nuai 10 chuang an hmu tih a sawi a. Prime Minister chuan vawiinah thalai sing 7 chuang hnenah hna pek thar leh a nih thu sawiin sorkar laipui hnuuia department hrang hrangah hna lak chhunzawm a nih theih nan beihpui thlak mek a nih thu a sawi a ni.

Mizoramah chuan sorkar laipuaia Fisheries, Animal Husbandry & Dairying leh Panchayati Raj changtu Minister of State Pu SP Singh Baghel hoin AR Lammual bula Assam Rifles hmunah hman a ni a. Minister chuan thu sawiin vawiin thalai te hna hmuhna appointment letter pekchhuah runpui, Rozgar Mela vawi 14-naa hna thahnem tak thalai te pek a ni chu ram tana sorkar hna thawh ropui tak a ni a ti a. Vawiina appointment letter pekchhuah te chu a lawmpui thu sawiin an hna hmuh chhan chu an thawhrimna leh an inpekna vang a nih thu a sawi a ni.

Pu SP Singh Baghel chuan Prime Minister Narendra Modia hmathlir fing tak chuan India ramah hmasawanna nasa takin a thlen tih a sawi a. Ramchhung mipui tam tak hlawhtlinna kawngah a hruai tih sawiin Rozgar Mela chu ramchhunga thalaite tana a inpekzia pholangtu pawimawh tak a ni a ti. Minister chuan vawiina hna hmu thar te chu tha taka hna thawka inpekna leh tih tak takna nena bul tan turin a sawm a ni.

Vawiina Mizorama Rozgar Mela kaltlanga appointment letter pek te hi Assam Rifles-ah 76, Department Posts ah mi 10, SSB-ah mi 2, ITBP-ah mi 3 an vaiin mi 91 an ni a. Mizoram University-a Multi Tasking Staff hna hmu thar Shirley leh David-a ten Rozgar Mela kaltlanga hna an hmu avanga an lawm thu Akashvani an hrilh.



## **OVER 10 LAKH GOVT JOBS PROVIDED TO YOUTH IN LAST 1.5 YEARS: PM MODI**

Prime Minister Narendra Modi-a chuan kum 1 leh a chanve kalta chhung khan ram chhung thalai nuai 10 chuang hnenah sawrkar hna pek a ni a ti.

Prime Minister hian vawiin khan biak hmuhtheihna kaltlangin sawrkar hna hmuhna lehkha (appointment letter) sing 7 sang 1 chuang ram chhunga thalai hna hmu tharte hnenah a sem chhuak a. Prime Minister chuan heng hnate hi langtlang taka pek an nih thu a sawi a, fel fai taka hna lak a ni a ti.

Narendra Modi-a chuan Rozgar Mela-in thalai a tuam chak thu leh, an theihna a haichhuah thu a sawi a. Thalaite theihna leh thiam thil haichhuah chu sawrkar ngaih pawimawh a ni a ti a. Thalaite tan scheme chi hrang hrang chhawpchhuah a nih thu a sawi bawk.



## **NATIONAL FARMERS' DAY**

Vawiin khan ram pumah Lo Neitute Ni (National Farmers' Day) hman a ni.

He ni hi ram hmasawna leh thanna tura loneitute tha thawh chawimawina atana hman a ni a. Buh leh bala ram a intodelh theihna tura lo neitute thawhrinna hriat tharna atan te, thingtlang lam ei leh bar dinhmun chawisanna kawngah te, lo neih leh huan siam lama ram kal phung rochun chhawm nunna kawnga loneitute pawimawhna hriat thar lehna ni atan hman a ni.

Loneitute pawimawhzia hriain Sawrkar laipui pawhin loneitute hamthatna tur scheme engemaw zat a chhawpchhuak a, chung zingah chuan Pradhan Mantri Kisan Samman Nidhi, Pradhan Mantri Fasal Bima Yojana leh Pradhan Mantri Kisan Maandhan Yojana-te a tel a ni.

Loneituten chaw an tharchhuah, a fang ei chi chu kumin hian ton Mtd 332.2 a ni a, nikuma thar chhuah ton Mtd 329.7 chu a khum a ni.

